

Aston

Mainta gens mi malrazona
quar ieu non chant plus soven.
E qui d'aisso m'ocaizona
non sap ges quan longamen
m'a tengut en greu pessamen
cill que mon cor empreisona,
don ieu pert esbaudimen,
tal desconort mi dona.

Pero si·m fo douss' e bona
ma dompn' al comensamen,
era no m'acuoill ni·m sona
mas aissi cum l'autra gen.
Car conois qu'ieu l'am finamen,
a! cum mal m'o guizerdona!
Amors fara falhimen
s'aquest tort li perdona.

De tota joia·m desloigna
ma dompn' e no·il es honors,
qu'ab calque plazen messoigna
mi pogr' il far gen socors.
Ar sai que non es mas folhors
aquest'entendensa loigna,
don ai faich tantas clamors
q'onta n'ai e vergoigna.

Partirai m'en ieu? Non ja,
que sos pretz e sa valors
m'o defen e m'o caloigna
quant ieu cuig amar aillors;
per tot lo cor m'intra l'amors
si cum fai l'aigu' en l'espoigna.
Tots temps mi plaira·l dolors
cum qe·m destreign' e·m poigna.

Ades vuoill c'amors m'asaila
e·m guerrei maitin e ser;
contra la soa batailla
non qier ja repaus aver.
E s'ieu non ai tot mon voler,
tals es cella qe·m trebailla

qu'el mon non a nuill plazer
que lo mieu maltraich vailla.

Lauzenga ni devinailla
d'enveios no·m cal temer.
Sol pensiers de lieis no·m failla
us no m'en pot dan tener;
que·l cossirs don ieu m'alezer
mi pais mieills d'autra vitailla,
per qu'ieu non ai en poder
mos cors neis s'anuailla.

Chansos, a totz potz dir' en ver
qu'en mon chan non agra failla
si·m volgues d'amor valer
ma dompna, cui jois vailla.

- letto 584 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/aston-17>